

Pengisytiharan Kemerdekaan Persekutuan Tanah Melayu

Pada hari ini dalam tahun 1957, tepat pada detik 12.00 tengah malam, Padang Kelab Selangor di Kuala Lumpur, bergema dan bergemuruh dengan laungan “MERDEKA” yang penuh bersemangat bagi menandakan lahirnya sebuah negara baru yang berdaulat, setaraf dan setimpal dengan semua negara-negara yang berdaulat di dunia. Pada keesokan harinya tepat pada jam 9.30 pagi bermula dengan nama Allah dan segala pujiannya serta salawat dan salam ke atas para Rasul, Tunku Abdul Rahman, Perdana Menteri Persekutuan Tanah Melayu yang pertama, telah mengisytiharkan kemerdekaan ibu pertiwi ini dari penjajahan Inggeris berdasarkan kepada Perjanjian Persekutuan Tanah Melayu 1957, di hadapan 20 ribu rakyat Persekutuan Tanah Melayu dan Raja-rajanya serta perwakilan dari 30 negara-negara Komanwel dan negara-negara asing lainnya, di Stadium Merdeka, Kuala Lumpur. Di akhir pengisytiharan itu Tunku meneriakkan Merdeka sebanyak tujuh kali dan disambut dengan bergemuruh oleh rakyat yang hadir. Serentak dengan itu bendera Persekutuan Tanah Melayu telah dinaikkan dengan irungan Lagu Kebangsaan Negaraku yang buat pertama kalinya diperdengarkan, dan diikuti pula dengan seruan azan dan tembakan meriam seratus satu das. Dengan itu berakhirlah penjajahan Inggeris ke atas Persekutuan Tanah Melayu termasuk Pulau Pinang dan Melaka. Pada jam 5.23 petang hari yang sama, bekas Pesuruhjaya Tinggi British di Persekutuan Tanah Melayu, Sir Donald MacGillivray dan isterinya meninggalkan Persekutuan Tanah Melayu untuk pulang ke England.